

ZION THUSUAK

REVIVAL CHURCH



OF GOD (RCG)

Vol. XXV

March - April 2021

No. 126



THUPI:

**“...ginna ziak ah thamuanna leh kipak-
na zosia achun Pathian chun hun hidim
tahren”**

Rom 15:13

Editor: Rev. Dr. Khupkam Vaiphei

ZION THUSUAK

EDITOR:

Rev. Dr. Khupkam Vaiphei

Associate Editors:

1. Rev. Liante
2. Rev. Ngulneipau

Contributing Editors:

1. Mr. Kh. Sang Vaiphei
2. Rev. Kailum

Advisor:

Rev. Kamlam

Board Members:

1. Upa Mangkam
2. Upa Tinhang

ASUNG AH THUTE**Page**

- | | |
|--|----|
| 1. Editorial | 01 |
| 2. Pathian gam a ding ah puitu
te leh mithiam te titlona/
taksapna | 02 |
| 3. Khawvel ahin malzin ka hi | 07 |
| 4. Mi'n ei taksan ngam
pawimaw i hiu | 09 |
| 5. Thansua | 12 |
| 6. Pathian zilsakna dik in
zil til in | 15 |
| 7. Sia leh Pha | 17 |
| 8. Ginna ah thamuana | 20 |
| 9. Pauchapna het dingte | 22 |
| 10. Hetsakna | 23 |
| 11. Collector/Magazin Agen List | 24 |

Address:**ZION THUSUAK**

**RCG Head Office, Hilltown, P.O. Box – 91,
Churachandpur 795128 , Manipur, India**

Editorial....✍

Lalpa'n damna leh phatpha te ei pian Zion Thusuak March-April 2021 Issue sua daw kit thei ta dingah i um thei tak ziak un hunpha leh phat pha eipia tu Pa Pathian chu pak in umta hen.



Khawvel thuthang i hiatteu haw hi isui chun bible ah kigen hun nunung lam tak le kido/kigal, kitha/kimat, natna kidang dang hung um masan tin zawle Lalgam hung tung paita ding ahi ti kigen kha a hung naima ma tai ti mu leh het thei ahi tan ahi. Gingtu leh gingtu kiki hek panta, leisiat mun leh gam kiki chu panta, hothu lam inle apawl apawl ah kidaidanna hung um gamta, hepina dai deu deu ziangta, amau pawl sang in keimau umna pawl dikpen, hawipen, hatpen ahi ti in kiki suang gamta. Pawldang te him him thulak inle kinei gam talo, eima bep pha kisa, dik kisakna gam kitung gam ta, akhawk sek hi aw, Pathian thu dik tak in kihing zo talo, i kam in awlmawlo thu gen, i lungthim inla muanna him him nei thei talo, a ziak chu midang mudana leh midang chungah engsiatna lunggel kinei ahi zia kin. Hiti hin gingtu khat hi ngal ah la hinkhua la mat zing ziang chun tunungah (taksa thizaw nung) le la chan ding te chu lungmuan thei kipakpi thei ahi kha na diam maw, munthip khat ah thip bek in chûn lang vak kigel tia, la lung amuang tak tak nam? Amuan lo chun tuhun hi kigel thakna hun ahi ti gel in thupukna siam thak le chun nawp a um hi.

Kotkhak neu ah chun lut un, manthaina lam zotna kotchu alian in, a lampile a nuam in, zia lam ah chia chu tam le a tam ui. Mathai 7:13. Tulai in mitam na lam lam chu a pha ahi ti in mitam zawpi lunggel le ahi tan ahi, a ziak chu thagau ah ki etkawl na taw taksa ah ki etkawl na hi kibang lo ahi zia kin, taksa lam ki etkawl na anuam in, awl le aki awl hi tina zia kin, mi tampin zia gam chu del ah bel ding lunggel anei gam tau in, setan kipakna leh thatnawp na lam tak chu ahung hitan ahi. la lung amuang nai maw? Pathian hukdamna hi tam leh tawm in a paw pua, eimau ginna ah kinga ahi, ahinla Ginna kingakna chu thagau ah kikaihuaina dik pawl chun hukdamna lampin eipui thei ahikit hi, zia chu thagau thiangtho apat thupawt chu ahi. kigel pha him him in aw. Lalpân athu hi hun malsawm ta hen, Amen.

PATHIAN GAM A DING AH PUITU TE LEH MITHIAM TE TITLONA/TAKSAPNA

By; Rev.Dr.Khupkam Vaiphei

Nikhat hi lung gel kawm in ka kingai tua zinglai in, zia thu “**Pathian gam a ding ah puitu leh mithiam te titlona/taksapna**” thu hi ahung kilang in, ahung kilat dan thu hi keima gual ah um midang te hiat ding in suklat ka nuam in, zia ziak a chun tu chung issue na hin avel in ka hun suklat ahi, R&MB te silver Jubilee souvenir ale sua ahi.

Zia thu hin agen nuam pen chu, Puitu kiti Lamkai te leh mithiam khen khat kua hi ziang le le, Kochuam sung ah pang ahem, ahilo le mission sung ah puitu ahem, ahilole, Bial sung ah pang ahem, ahilole, Numei pawl leh khanglai pawl ah pang ahem te hin amaw puaknau ah asepu bukim zawk diak thei na ding un, zia anuai ah gual ahin pan mun leh panthak lak ding dan ki hil leu hen ti ka nuam hi.

(1). Kochuam (Local church ah) maw puakna nei puitu (Leader) zosia te ding in.

Puitu (Leader) khat hi ngal, mithiam khat le hi ngal, maleh amaw puak nalam ah atitlo na leh ataksap na khat chu, a inn sungmi ngai khawk lo, a innsung

khawsak nau le akivaihawmnau ngaikhawk lo ah a um na hi ahi. Mipi te chung ah vaihawm leh puitu (leader) khat ahi chun, a umna a innsung mite taw kihiat thiamlo na leh kisitna bangma aneilo ding a ngai hi. A ziak chu aman lah puitu leader khat ka hi, mipi te chung ah vaihawm thunei leh maw puakna liantak neimi khat kahi tin tin, ahinla ama chu alwaysam sa leh atasam sa ahi, a ziak chu, sawlchak pual in mipi chungah thunei ding le vaihawm ding mi chu a innsung khawsak sutup thei mi ahi ding ahi ati ahi- **1 Tim.3:2-9**. zia hi Upa ordain changte a ding bep in la gel khamaithei ahi. Pathian kochuam enkawl ding te Puitu te a gen na ahi tin pawm mai dik ding in ka gel ahi. Lalpa Pathian in zawlnei Isai mangchan Hezekiah kianga

la innsung sutup in thiding lahi avati ahi kha- **Isai 38:1**. Amasan innsung suktup ding hi ahi Pa Pathian in adawi pen chu, Pathian dawipen bawl lo ah mi pâk chak ding ahem minphat ding bep dawi ah puitu la la hi khak chun ki ngai tua thak in, la chung in lalpa akipak tak tak na diam. zia thu hi la hiat khial khâk diu le pha kasa puai, a ziak chu mipi puitu (leader) la hina haisan in kati na vang ahi puai, Lalpan Mosi leh Joshua amat chak gual in mipi te lam dik ah puitu leader hi dingin adawi ahi. Himaleh amasan la innsung mite taw lungthim mun khat le kituak tak in um khawm un tichun lalpân hun umpi ding ahi ka ti ahi zawi.

Zi leh chanei mi la hi chun lazi lacha te taw kilemna nei masân lang, zi leh chaneilo Tangval/Nu ngak lahi chun lanu leh lapa, la uhnau te taw kilem masân, chuti leh la maw puakna te chu fel tak in zo thei in latin, Pathian kipakna leh lung awina chang ding la hi.

La innsung bep ngaikhawk in lang la maw puakna ngai nep in kati na ahi diak puai, mi khen

khat zia gual a chun ama lawkna ding bep ngaitua ah a maw puakna te ngai khawk lo le a um ma tho ui, ahinla, ziagual mite gual a chun um him him kin, la maw puakna chu Pathian in apiak ahi ti in la ngai ding ahi, la maw puakna la ngai khawk lo chun ahun teltu Pathian la ngaisak lo hung bang ding ahi. Abang hile amasan agam leh afelna hawl masân ati ahi Jesu'n- **Mathai 6:33**. Puitu ding chu amasan apianthak masak angai tei tei hi, piangthak lo puitu hi khak ding hi alau um ma ma hi, a ziak chu ama ngai dan taw Pathian dawidan hung kibat lo tak leh ama chun apaw zolo ahi, a ziak chu ama hâtnân puak aguat ziak in, Kochuam kiti hi Pathian ah ahi ziak in aneitu pa Pathian taw kituaklo in la pui chun haksa sân la tin genthei leh kisa ding la hi. Jesu'n "ka ngawngkaw! hi apuak anuam ah, ka puak le azâng ahi atia" **Mathai 11:30**. Kochuam enkawl leh puitu khat la hi chun, hawi deu in ki ngai tua in, dân khat to le Lalpa ang ah gen ding nei lo in um khan la.

(2). Numei pawl leh Khanglai pawl ah mawpuakna nei puitu (Leader) zosia te ding in.

(Zia hi pawlpi Mission sung leh Bial sung ah mawpuakna nei te ding ahi.)

Puitu (Leader) khat hi ngal, mithiam khat le hi ngal, maleh amaw puak nalam ah atitlo na leh atâksap na khat chu, a umna kochuam sung ngai khawk lo, aumna kochuam te khawsak na leh kivaihawmna ngaikhawk lo ah a um na hi ahi. Mipi te chung ah vaihawm leh puitu (leader) khat ahi chun, a umna kochuam mite taw kihiat thiamlo na leh kisitna bangma aneilo ding a ngai hi. A ziak chu aman lah puitu leader khat ka hi, mipi te chung ah vaihawm thunei leh maw puakna liantak neimi khat kahi tîn tin, ahinla ama chu a umna kochuam mite dem kai le sit um mi khat ahin ahi, a ziak chu, sawlchak pual in mipi chungah thunei ding le vaihawm ding mi chu a innsung khawsak sutup thei mi ahi ding ahi ati ahi- **1 Tim.3:2-9**. zia hi Upa ordain changte a ding bep in gello ah, Pathian kochuam enkawl ding te Puitu te a gen na ahi tîn pawm pha kasai. Zia hin a

innsung khawsak ati hi a umna kochuam ati na in kila phawt le. A ziak chu kochuam hi gingtu mite kipawl khawmna/ umkhawmna ahia, chuleh kochuam hi innkuan khat/innsung khat ahi.

2Kor.6:18; 1Tim 3:15; Ephe 2:19. Lalpa Pathian in zawlnei Isai mangchan Hezekiah kianga la innsung sutup in thiding lahi avati ahi kha- **Isai 38:1**. Amasan la umna kochuam suktup ding hi ahi Pa Pathian in adawi pen chu, Pathian dawipen bawl lo ah mi pâk chak ding ahem minphat ding bep dawih ahi puitu la la hi khak chun ki ngai tua thak in la chung in lalpa akipak tak tak thei na diam. zia thu hi la hiat khial khâk diu le ka nuam puai, a ziak chu mipi puitu (leader) la hina haisan in kati na vang ahi diak puai, Lalpan Mosi leh Joshua amat chak gual in mipi te lam dik ah puitu leader hi dingin adawi ahi. Himaleh amasan la umna kochuam mite taw lungthim mun khat le kituak tak in um khawm un tichun lalpân hun umpi ding ahi ka ti ahi zawi.

Puitu (Leader) kuale a umna kochuam te ngainalo ah khawk

salo a um chun, ama ziak in a umna kochuam sung chu abuailo thei lo ahi. Mundang ah amaw puakna afelthei chan in na kasem hi ti maleh, a umna kochuam a ngai khawk lo chun, Pathian kochuam a ngaina puai ti ding ahi. La umna kochuam te hi Khrista taksa ahi ziak in, **Ephesi 1:2-23**. Khrista taksa la ngainatlo ah la ngai khawk lo chun Thagau ah pianthakna leh Pathian cha hi na lanei lo ahi kiti le za lakah sawm kuale kua 99/100 dik ding ahi.

Nasepte lekha bu ziktu Dr.Lukân hiti hin ala gen ah. Thagau thiangtho chu nangmau in ahung um takle chu thilitheina hun nei in la tiu in, tak chuleh, Jerusalem ate, Juda gam ate, Samaria gam ate leh, kawl kawdawng tiang in ka thu hiatsaktu/hiatpitu (witness) in hung pang in lau ati ahi. **Nasepte 1:8**. Ziatak ah Dr. Lukân agen dan tak hi i et ahi chun, min Pianthakna anei ah, Pathian Thagau thiangtho anei chun, Pathian a ding ah hiatpi tu (Witness) in ahung pang ngam hi ti ahia, chuleh ama chun Jerusalem ate, Juda gam ate, Samaria gam ate leh kawl

kawdawng tiang in ati hi-Jerusalem hi a umna gam kochuam taw te kak ahia, a umna gam kochuam sung in na sem pan intin, chuleh akûl dung zui in mun dang dang aten le a chia ah agen ding ti ahi zawi. Zia bep chule hilo in Hebrai lekha thawt ziktu hinle hiti hin eila gen ahi. La umnau gam in khat leh khat kitil hât tuau inlang, ki khawk sak tua chiat in umta un ati ahi. **Hebrai 10:23-25**.

Mithiam khat hi, chuleh, Pathian mite lak ah puitu (Leader) khat la hi khak chun, Pathian leh mipi te kikâl ah mawpuakna lian tak nei la hi ti hawitak in hian. Puitu Lamkai khat hi ziak ah min phat ding leh genphat ding bep dawina ziak puitu la hi khak chun, nangma ah Jesu Hepina a umpuai ti hechian in. Jesu hepi na nei ten ama ma khual bep a gel ngai lo uh ahi. **1Kor 13:4-7**. Puitu ama lawk na ding leh phatchuamna ding bep ngaitua te hin Jesu hepi na anei lo ahiau.

Puitu ama titlo na ziak in a umna kochuam ten siatna atuak ding ua ahile chu ama chu a chung agik hi, ama a ding in asepmun

apat aki resign ding chu pha zaw na ka ti ahi. Puitu (Leader) kuale chapo na nei, kihisakna lung gel anei chun, ama chu puitu (Leader) hina tinglo disqualified ahi.

I umna kochuam bep ngai khawk ah, kochuam dangte chu ngaikhawk lo ding kati na vang ahi diak puai. Kochuam dangte le Pathian kochuam a hi chiat un, amau haw le ngai khawk ding chu ahi. Ahinla ken tunin ka gen nuam pen ahile, I umna kochuam musit ah midang kochuam ngaisang zawk ti haw hi nei lo ding, I umna kochuam

suk hat ah panpi ding, kikhawppi zing ding, I hun I tha te piak masak zawk ding ti ahi zawi. La umna kochuam in kitu lut inlang ki submit in ti ahi. Mi khen khat te gual in Chapo na lung gel nei in la umna kochuam puitu te musit kin kati ahi. La umna kochuam member te atawm ziak in musit kinlang, atam ziak inle kisuang kin, apaniu in Lalpa ah gel gel ahi. Dawitak ah simtu te zosia la leng un Lalpân hun malzawl henlang, Puitu dik leh fel, mipi ki ngakna tâk hithei chiat ding in pilna, chitna leh thiamna ten hun malzawl chiat ta hen. Amen. Kakipak hi.

KHAWVEL AH HIN MALZIN KA HI*By: Rev. Liante**GPIT, SHUATS Prayagraj (Allahabad) UP*

Malzin i hina gam leh inn ah chun chawldam taktak a um lo ahi, taksalam ah chun la chawldam thei maithei a, 'maleh lungthimlam ah chun la chawldam lo maithei hi, ahiloleh lungthim lam ah chun la chawldam thei maithei a, 'maleh taksalam ah chun la chawldam lo maithei hi. Ahiloleh thagaulam beka la chawldam lo maithei ahi. Bang ziakin? La sepna ahiloleh la zilna zia bep hilo in, la umna inn leh gam chu mi dang a ahi ziakin, chuleh nang hun hepi pen te tawh um khawm lo la hi ziakin, amau hun hepina chun la lunggil a sukkhak sek ziakin na la sa, tichun la lungthim in nang hun hepita chu la thangai in la gel zing sek ahi.

Nang hun hepi pen la nu leh pa, la zi leh pawsal, la tu leh cha, la u leh nau, ahiloleh la insung mi leh sa khat pen pen la ngai vawngvawng ni a um tei ding ahi. Ziagualmachun, ei hepitu penpen van ah i Pa leh ei Hukdamtu Lalpa Jesu i ngai vawng vawng ni a um sek ahi. Aziakchu, Pathian ahiloleh Lalpa Jesu khel ah ei hepita ding um lo ahi ziakin. Laphuaktu khat in, "Ei hepita ding dang ka mu puai khawvel ahin, ka Pa lo chu ka gâl ahi, gitlo in taisan maleng a phatna chuai ngailo...." ti khel ah hepina lian zaw a um ta lo ahi. Ziaziakachun, Pathian ei hepita chun i lunggil a sukha sek a, na i

sasek ahi, tichun i lunggil in ei hepita Pathian chu zia khawvel i khualzinna gam ah kipat hin i thangai in i ngai vawng vawng sek ahi. I khualzinna gam ah kipat i nu leh pa ahiloleh i insungmite kiang i tun hun takleh i kipakin i chawldamsek ahi. Bang ziakin? I inn taktak ahi tak ziakin i nawp dandan ah um in i chawldam thei ta ahi.

Ziagualmachun, zia khawvel ah i damsung ah hun chawmkhat atangpiin kum 70/80/90 sung vel bep chenna ding in i pa saksia inn chu i nei ua, zia chu khawvel gam ah ahiloleh taksa thu ah chun i inn taktak chu ahi ngei hi.

Ahinla i pa inn ah um ahiloleh cheng ziang malehinle i chawldam den thei taktak diak lo ahi. Aziakchu, sep leh bawl ding nei zing i hi baka, gim leh chawl jel i hi ziakin. Ziabankitahchun, gilki-al-dangchak, nat leh sat, damlo-hitang, lunggim-lungngai, hatsat-genthei tuak jel i hia; chuleh, thi leh man tiang tuak nalai ding i hi ziakin zia khawvel ahin malzin mai i hui tichu a

kichian hi. Himaleh Lapa Jesu'n ei siampiak (Johan 14:2-3), van ah inn, khut ah sak lo, Pathian sak kumtuang ah um ding (2 Kor. 5:1) chu i inn taktak ding uh ahi tak ziakin zia takah chun kumkhawtuang in i chawldam thei bep ding uh ahi.

Lalpa'n 'khawvel ah hin malzin ka hi' ti ki hedawk zing thei ding in a thu ei malzawl piak ta hen.

MI'N EI TAKSAN NGAM PAWIMAW I HIU

*By: K Chung Vaiphei
Kangvai Village*

Amasa'n simtu dawitak, Pathian mapuina zâl ah ZION THUSUAK apat Chanchinpha tângkopi zêl thei ah ium ziaak un kipak aum mama in, piting zaw diak ah i tângkopi zel theina ding ua pauchapna tawh thua ah a la sim zing tute Khrista Jesu min in CHIBAI ka hun buk hi.

Kochuam leh khawtâng hinkhua ah dawisakna dawngtu, i Chi leh Nam thudawl ziang a le _Midangte taksan ngam_ i hinaw em ti i kihatchian ua, taksan ngam dingah i kisiam uh pawimaw ka sak mama ziaak in ka hiatna kham kham ah genlat ka nuam hi. Taksanna dawngtu zosia chu puitu a hi'diak pua, puitu hina a la nei khalo hialte le taksanna dawnglo ti ah musit ziang le a hithei diak puai. Puitu dinmun lua in puitu hikhel lo maleu hinle _Midang te'n a hun taksang ngam na'u em_ ti hi, damsung khawsakna ah hiatchian ah sukdik pawimaw mama te lak ah khat a hi'ngei ding ginchat aum hi.

Midang te'n a hun taksan ngamna ding un bang la bawl sek em ti'n dawtna um taleh

dawnhu kit bailam talaw di'n ginchat aum puai. Aziakchu, "thudik dinpitu ka hia, mi dangte haksatna ding bangma ka bawl ngai pua, ka nei dan dan ah panpitu ka hisek hi" tite hi, i nasep te'u lak ah i chiapi pen uh hi'khel lo maleh i lunggel un hung kilang masapen mai ding in ka gingchai. Ahi'n, ziagual nasep chiapi zing ngal, himaleh, kochuam leh khawtâng ah kithawl diak lo mi aum thei hi. Bible ah imu gual un, _"La um dan uh chu Khrista chanchinpha tawh kituak sak phawt un"_ ti'n a la gen hi. Chanchinpha tawh kituak lo, diklo tak ah khawlkhawmna te apat panpitu, a tamzaw mukit ding kinepna nei ziaak ah thilpha bawl tamtak i la umsek ziaak un, lunggil tak ah dawisakna nei ah semtu hilo chu _midangte taksan ngamna_

chule i la nei tak tak thei diak puau hi. Kitaksan tuana, kitaksan ngamna umlona Insung leh gamsung chun chamna aum theipua, kichamna umlona chun pitinna aum pua, piting tak ah nasepna aum theilo phat leh gâl a suak mai sek hi. Midang in a hun taksan ngam la pawimaw in, midang in ei taksan ngam ka pawimaw hi. Kochuam leh khawtâng, i Chî leh Nam inle mi taksan'um a mamaw hi.

Banggual ah taksan um ah kisiam in damsung hinkhua i mang ta diam le! Pastor khat holimna ka ngaisan mama leh thilthak ei hiatdaw sak chu: "Khangthak zukham lawikhat in 'Bang ti Pastor chule la hia zia chule bawltheilo ziang la hem e' ti ah ei vak engho git uh ka vak hiat chun ka lungthim a na mama ziang hi. Aziakchu, Pathian min ah ka chan Pastor ka hi-na minlam ah kilawm lo tak ah ei vak engho na'u chu ka ngaithiam theilo hial ahi. Amau chu zukham husa gual mai ah gel thei himale'u thuk kit nawpna hial ka nei man hi. Aziakchu, Pathian min ah ka hi-na Pastor chu ka zâ mama zia ahi" ti'n a holimna chun a gen hi. Zia'h a thugenna

apat thilpha lakdaw thei ka mu chu, "Pathian min ah ka chan ka hi-na" ti chu ahi. Aleh, nang inle la hi-na chu zâ tak in la enkawl zing na'm? Zi leh chate zia in 'Pa' dinmun piak in ium ua, Pawsal leh chate zia in 'Nu' dinmun piak in ium ui. Ziagualmachun, Nu leh Pa te apat 'Chanu/Chapa' hi-na piak in ium ui. Kum upat zia bep in nupi/upa tithei i hipua, ei hingtu umlo in chanu/chapa tithei le i hi'diak puau. Bang zia ah pawsal in 'Pa' a hi-na zâ lo ah a zi angung ah zawldang sâi ah zu leh sa ah nawpchen? Bang atia 'Nu' dinmun piak ah a umna zâ lo ah a pawsal ângung apat zawldang sâi? Aleh, Chanu/Chapa te'n le 'Cha' hina dinmun zâ lo ah Nu leh Pa ang ah vaihawmtu dinmun lua ziang sek? Bang zia ah thanguai tak ah kihel pawlche mai? Insung, Kochuam, Khawtâng leh i gam ah chamna aum theilona leh pitinna tak tak a tun theilo sekna hi, Pathian apat i dawn i dinmun te'u, i hi-na te'u hawmthaw zia ah i zâ lo zia uh ahi.

Mi hausu leh lekthiam te'n a hausatna'u leh a zilthiam na'u za

in enkawl hawi leu midang
simmaw na'n nei puana'u. Mi
genthei leh lekthiamlo te le, a
hi-na khêl ua ki'ngaisanglo in, a
ma'u hi-na ding tiang piak ah
aum na'u in lungawi uh henla,
zia'h a dinmun uh chu za'u hen;
chutileh, midangte taksan
ngamlo ding khawp ah
chuambawl na tuak kuama umlo
mai ding i hui. Kichuambawl
tuana umlo ah i khawsak khawm
thei phat ua leh Insung,
Kochuam, Khawtâng hinkhua leh
Chi leh Nam thudawl ah i
vaihawmna te'u chu lamzang in
piting mama mai ding ahi.
Midang in a hun taksan ngam i
mamaw chiat ui. Kitaksan ngam

tuana hin kilâinatna ei piai.
Ziagual dinmun lua thei dingah
kisiam dik theina hun lemchang
nei nalaite i hi'ziak un vangpha
mama ihui. _La hinkhua ah la
tunna tiang kha zachatpi kinla, la
dinmun leh la hi-na kha zâ tak in
enkawl pha'n; Chutileh, midangte
taksan ngam hi'ngei ding la hi._
Midang in ei taksanna matsua
nung ah vaihawmna chutpha
chut chuh ngawlhuai mai mai
ahia, lawtin ding zia le aum lo
hial ahi. Tuni hin, eima chiat ah
midangte taksan ngam in kisiam
chiat leu hin Insung, Kochuam,
Khawtâng leh i Gam in damna
mu'ngei ding ahi.

THANSUA

*By: Upa Khaitingen
Salem veng*

Kochuam Upa nasep sem ding in Pathian kona chang in kum 2010, kum tawp khawmpi feb 2011, in namdet na kala chang a, tuhin 2020, kum tawp khawmpi feb 2021 in Upa thansua ding in ka um ta ahi. Pathian nasep sem ding ihizing lai ahin insung leh mimal hinkhua ahin haksatna tamtak in eizui sek ah, Pathian nasep leh mite kithuapi na ding ahin lungkiak ni atam sek ahi.

Kum 2018 akhan Sam 84:5 hi kumthupi in kala mang ah. Nangma ah kipat hatna neite leh a lunggil ua Zion zawtna lamlian neite chu mihampha ahiu ti hi ziathu gentu te chule Pathian akipat chan nei ngei inau, ti zia thupi ah mang in thingtang khua (9) a chia nading a phalna la in keima kitodel in kava chia ahi. In kahung tun in West-Bengal Siliguri, Living word Centre mun in keima kitodel in thani 2 Short term course Bible kava zil ah, Student 48 lak in a kum upa pen kahia, 64 ting ta kahi. Taksa thil ah kakingai tua leh Upa kaki sathim ta, ka pauchap na chun Lalpa zia zil ding ahin ka kum Upa kakisathim ta, nang in bang a mat ding lei tia zia tiang ahi lei pui ahem? katia, (Aw hetthei ding a dawnhu na chun, mite

kithuapi in ti hi ahi). Keima dawnhu na chun Lalpa kei hi bangma het na neilo bang ma thepna neilo kahi, ka kochuam te leh ka mite chu keisang a thiam zaw leh hetna nei te ngen ahiu katia, kalungthim a chun mission field bep a um ah, Mission Committte ah phalna la in Assam ah Zamlal Vaiphei School a pansa ding in phalpiak in ka um ah kipak um kasa mama ahi. Ziatak mun zuan ding achun Dt. 17th December 2018 ni ahin in nusia in thani (2) um ding in kachia ah, Dt 17th February 2019 ni'n in kahung tungkit ahi. Mission Field ten programme eisiam piak ua, Pathianni khat Kochuam pakhat ah thugen na tawh Kochuam ki etkolna thu, Kichenna, Nawsuana, Laklutna, Baptisma, Thawlawm chiading

dan, Naulatna, sum leh pai muding dan leh amau a ding ah pawimaw ding ah ngaite tawh. Zia zaw a chun Khristmas leh kum thak hun a chun pawsal tamtak chu Biakin lam sang in Picnic a chia a tam zaw ahisek ua, Khristmas ni An huan chu numei te ahiau ah, Biakin a muding pawsal atawm thei mama sek hi. Nungak pakhat School a Teacher pakhat Pawsal nei thu a buai na nei kakiang in ahung a, Houtu pa Pawsal neithu ah buai in lakiang a hung ka hi ei hung tia, Ka pawsal ding chu ka gam ua kipat ahung ah, ka chia dan uh chu amachun zan ah eihung giakpi ziang ding ahi. A zing a thai leh Pastor kou in nupan ahitau ti eipuan dawziang ding ahi. Kei chun EOC Kochuam kahin ziagual chu EOC dan ala hilo leh nawsua ah umding ka nuam puai, ziaziaak a chun la kiang ah hung kahi eitia. Kenle Kochuam dan ah kichen na dan chu phatak cha kala gen piak ah, ziagual a chun Dt 20 January 2019 ni in Mouzachapori EOC Biakin ah Kochuam dan thiangtho ah kichen na chu Rev. Ginlawmlal in a neisak ta ahi. Zia chu Mission Field ah kochuam

dan thiangtho ah kichen na masa pen chu ahi. Kochuam ten Pastor pan le abawl phan, nupan tenle a bawl pha mamau ahi ti in kochuam puitu ten keima kiang in ei gen ui. Zia chu mite kithuapi na nasep pakhat ahiziak in kipak um kasa mama ahi. Chun Brahmaputra chetua kal gam in Missionary pa tawh kava chiau ah. Zia gam chu tui alet phat leh a chupna gam ahia, lampi tichuam a umpua, light a um pua, chia na ding chu etzawn ah chia mai ahi. Zia tak mun achun gingtu ti ah minpu in 2 a um ua, a pakhat chu meithai ahia, a pakhat pa kiang a chun katung ua, nitak lam ahi ta, Khistian chu hinailo lunglut a um ua, ka kokhawm sak leh numei leh pawsal kigawm in mi (10) ahung ua, ziate kiang a chun Pathian thu kagen ah, ziatok mun ahin Biakin um leh pha lasau em kati leh pha kasau atiu ah, a biakin mun ding uh kahun genpiak ah kahung nung in zia tak achun Missionary pa lawi tawh Biakin chu sak ahia, himaleh a nung in enkoltu ding a kinep pi pa chu athita, Biakin chu enkol ding umlo in a umta ahi. Zia kipat ka um na kahung tun kit nung a

chun zan khat (Aw ah thu kigen kahe) Nang in Jesu Khrista thina leh thawkit na thu lagen kha puai eitia, katho ah Lalpa keiman lem kasak te kala gen mai ahi. Tuni kipat in ziathu chu gen tang ka katia, I Thes 4:13-17 thu ah Suapi te haw kinepna him neilo mite gual ah la lungkham lo na ding un, ipmute umdan lahetlo uh ka daw puau hi, ti thu gen ding in kala kisata. Zan in missionary pa'n phone in Houtupa ka nu'n ei nusia tai ahun tia, A zing a mithi vui ding in hung pek in ka um ah, ka phul mama ahi. Jesu thina leh thawkit na thu gen ding kahi ziak in mithi thakdaw na vuina I Thess 4: 13-17 leh Gen 3:19 thute mang a thakdaw na leh vuina thu ginglomite het thei ding a gendawk kahi ziak in Pathian hetsakna kachan chu kachan gual lo chang kahi ziak in

gendaw kal kangak la ahi. Pathian ei umpi nahi lopi kasa ahi, Pathian in lem ati leh tunung leh ga hunsua ngei ding in kinep um kasa ahi. Amau inle phatak cha ngaitua ahi ziak un. Zia ni chun mithi vuizaw in ginglo ten tui eithin khum un, a chuti lou leh damlo kha khang kau atiu ah, chia theilo in angak ua, Missionary pa chun tui kuang in ahun dawm dawm a tui chu ei latsak ua, Zia chu thinkhum ahi zaw un apel thei tau ahi. Ziagual chu Lapa eipui na chu ahi. Philipi 4:15 Paul in Thesolonika khua ka umlai a khan kahaksat na awng huk nading in khatvei lei hun thawt tau ah. Thilpiak chu hawl kahi puan nangmau ah ga hung piang ding chu hawl kahi zawi ati.

Pathian in simtu te hun malzawl ta hen. AMEN

PATHIAN ZILSAKNA DIK IN ZILTIL IN

By: GL Muana Neitham

Kochuam mite lak ah, a diakin hotute chun Pathian thuhing apat zilsakna dik (Sound teaching) ah et ua, a hinpi ua, mipite a ziltitl ding uh ahi. Bible a pat hilo leh Bible zilsakna kal a petmang tampi um ahi. Khawvel thil a Bible zilna mun tampitak a um in, ziltitlu diktak Pathian Thagau Thiangtho apat Bible thu hetna neilo mi tamtak a um kit un ahi. Gitlo kisikna châng diktak le helo leh Thagau ah pianthakna kitup neilo loiupa kiti leh Belampu lauthawng um mama atam ta mama ahi. Tha law dawina ziak ah, business dan a um, mission workers kiti tampi a um ahi. Si-al ahiloleh ngeichal hingal belum vun a kituam, satan lenggam ading a mi gin um leh belanno te puimamg zing hotu khat ihi khak ding lauthong um mama ahi.....Ki Ngaitiua thak hitiu.

Khristian kite ve sam, Khrista kochuam kiti sung ah buaina chuam chuam kidak um tak tak umzing hawhi puaknatna lanei kha em?

nuam, pauchap dam thei kiti te leh ki thagau misak a, chawm vel vel la tam deu deu: amau apat Thagau ga mu ding la umlo te haw hi puaknatna lanei khasek em?

Biakinn a kikhawm tam le tawm leh mipite thagaulam mangthai zingte haw hi puaknatna la nei em?

Pastor le kochuam upa kiti ten khawvel thuneina leh sum le pai etna ziak a, Pathian lopina ding mawng mawng umlona mun, Krista taw denna program ate Pauchap ve tei ding a aki sakla zing sek uh hi Puaknatna Pathian in hung pe kha nailo ahi em?

Thawlom a tam nak le kochuam khangto ahi tia kipak maite hawhi, puaknat um lasa kha sek em?

Himaleh, nang in vang thugin dik takte chu gen in. Upate chu

Pauchap group chuam chuam tamtak um zing, mi pauchap piak

kisûm ding, ja'um, a hun tiang he, ginna dik tak nei, hepina leh thok-hatna nei ding in; zia gual ma chun nupite le a umdan ua ja'um dingin, diklo tak ah mi lawttua lo dingin, zudawn chîng lo ding leh thilpha lam zilsaktu hi dingin thu hil inla, amau inle, numei khangdawng nalaite chu a pawsalteu hepi ding leh a chateu hepi dingin, kisumthei ding leh kikoi thiangtho ding leh, Insung enkol tup ding leh, pawsalte nuai ah kitulut ding leh, amau ah Pathian thu chu gensiat ah a um lona ding ah a hil theina ding un. Zia gual ma chun pawsal khanglaite chule kisûmthei dingin thu hil in. Bangkim ah thilpha lam taphot ah, mi etton dingin kisiam inla; la thugen ah chun la lunglut zia leh la ti'takna a kilat a; la paukam le dem kâi lo ahi ah, langkhat lam ah pangte chun la chung ah thu phalo him him gen ding mu lo ah a mualphona ding un. Suakte chu a puteu thumang ding leh, amau chu kipaksak zing ding leh nial ngailo dingin; khutthem neilo ah, ginum tak ah nasep pha latsak

ding leh, ei Hukhingpa Pathian thugin chu bangkim ah a choisa'n theina ding un hil in. Pathian doisakna chun, mi zosia â dingin hukdamna a hun kilatsak tangal a; zia chun Pathian ngaisak lona leh khawvel nopnate nusia ah, kisûm ah, diktat ah, tu'lai khawvel ah hin Pathian ngaisak ding leh, kinepna kipak um, I Pathian lopi tak leh Hukdampa Jesu Khrista kilâkna chu ngâk dingin ei hil a. Ama chu eimau â ding ah hung kipia'n, thiangtho leh nasep pha ah phatchuamngai, ama mite hiding in, gitlo zosia lak ah kipat ei tandok tai. Zia thute hi hil inla, zilgai in. Kuama'n hun simmaw kiu hen

TITA 2:1-15

Aw Lalpa ka gitlonau kihedok a, nangma bel ngamna lungchang ei pe chiat in..nangma apat zilsakna dik tak chu ei hetsak in. Thagau lamah mite manthaisaktu hitalo ding ei kem bit in aw Lalpa...Jesu min in ka nii hi AMEN.

SIA LEH PHA HETNA

(CONSCIENCE)

Gen. 3:22-7:23

By: Pro.Pastor St.Lianboi

P.Gamhawi

A. Dispensation 2 hun ah Pathian in go enkawl ding ah angansia chu, Cain leh Abel ahi. Sia leh pha hetna sung ah a thu ching ding leh enkawl ding ah, angansia Cain leh Abel chun, Pathian gen gual in bang ah bawl ta lo in, ama hetdan leh dawid dan in anche lo hing halmang thillat ding in ahun tuak tan, ahileh, Pathian in a san piak ta puai a ziak chu, Pathian in ama tawh ki ho matna ding ah mihiamte, a thupiak chu, gan thisan ah kithawi na maicham siam ding ti ala hi.

Abel in vang Pathian gen gual tak in maicham ding in Belaam hawitak ah, a hawi pen pen a jen dawk in, halmang thillat ding in a pia dawk in, a siam chu Pathian lungawi na kipakna na a chan ziak in, a san piak tai.

Cain chu, ama sia leh pha hetna dungzui in, maicham le a siam in, a sia leh phat hetna ma in, a suapipa, Abel le a that in, leisiat chung ah, tual that masapen a hung chang tan, diklo tak ah maicham siam masapen le a hung hi tai.

Cain chung in vang Pathian a lungawi zo ta puai, (Gen.4:6-7) Leng Solomon in vang ei ma sia leh pha hetna, kingak beklo ding ei til khau zing hi. (Prov. 3:6-8)

B. Zia hun lai ahin, mihiam te dinmun chu ama leh ama, sia leh pha, (Conscience) ah kinga ala hin, kipui huai na ding ah daan zia mawng ti le a um chuam diak puai tin, Bible scholar haw apat het leh ei kaw mu chu ahi. Pathian in vang, Cain chu a thiam maw na pat akisik

theina ding in a phawk in, himaleh, ama chu, gilo leh bawl khial kisa diak lo in, thiam akichan nalai hi.

Chuleh mihiam te hi, zia hun vel ahin, thahat ah kinaw tua leh gitlona, lungthim diklo nan, dim ahi tau hi. (Gen. 6:2) mihing gitlona leh sual nan a dim tak ziak un Pathian lungsiatna chang zo talo in, a lung natna zawk mihiamte chung in a chu tan, a mi siam te chung in a kisik tai. (Gen. 6:1 -)

C. THUPIAK LEH KITEPNA (COVENANTS)

Zia sia leh pha hetna sung ahin, mihiamte ama leh ama thutanna um ziang ahi. Mi dang chung ah, kuaman thutanna a bawl thei lo ding ahi.

Pathian bep in, migilo leh michawnsia te chung in thutan na a bawl piak ahi. (Gen.4:15) mihiamte Pathian in, aw git in a ho in, a ki puang hi, aw git ma in thu a gen hi. (Gen. 3:9-19)

D. MIHIAMTEN KITEPNA THUPIAK ZUILO

Zia hun lai ah, gan thisan ah Pathian kiang ah kithawi na maicham bawl ding ah, a thu piak chu Cain in zuilo/nitlo in, ama sia leh pha hetna dungzui in, anche lohing in abawl tak ziak in, Pathian in asan piak lo ahi tai. (Gen. 4:3-4)

Chuleh, mihiamten Pathian kiang ah hukdamna hawl sang in, Pathian do na zawk in, a sun a zan in gitlo thulthana, tha'n huainan a dim tak ziak un Pathian lungnatna a chung un a chu tai. (Gen. 4:8,23: 6:3-6)

E. HAKSATNA A KHAWN

Zia hun lai ahin, mihiam in ama gitlo chawnsetna puak gik a ki puak ahi. Mihiam te ma in, a puak gik leh a gitlo nau, a thiammawnau sethak na ding a nei puau hi tin Bible thiam haw suidan ahi. (Gen. 4:14)

Sethak na ding lungthim le a nei puau in, thiam akichan nalai un, puak gik puak nan a lungthim uh ahi dim tau hi.

Zia phat sung ahin, mihiamte chu ama leh ama kisuan nan a dim suak ziang tau in, Pathian ziangle suanglo in, ama haw a ki suang un, Bible Biblical tawh vang, akita ta puai, a ziak chu, a suang tapo in Lalpa suang ta un, ti ahi ngal in, zia chu hilo in amau zawk aki suan tak ziak un, Bible suidan, chiadan, in vang a chawn siatnau, a gitlo nau lianpen chu a hung hi tau. (Gen. 4:19-24)

F. CAIN THUTAKLONA

Zia hun ahin “Go” enkawl ah kingansia, Cain chun, a suapipa, Abel atha ziak in, Lalpa angung apat in, Nod gam sung, sualam pang in a va cheng tai tin Bible in ei gen hi. (Gen. 4:16)

Mikhen khat in Nod gam hi ala um sa, zia chun va zamlut dan in ngaidan a nei ui, zia thu hi (Cult) a hi bo hi. Nod gam kiti, thuchang hi, Hebrew pau ahin, vakvaipa/vakchavai pa (Wanderer or Wandering) tinaahi. Vakchavaipa va tun na mun ahi ziak in, a va siam daw tin, Bible thiamte suidan ahi.

Zia ziak achun, zia mun chu Nod gam, vakvaina, gam tina ahi. (Gen.4:16) Cain in Lalpa ang apat zam daw ka hi tia a kigel vang a chun, a zam na mun chule, Pathian gam/umna sung ma ahi.

ACHAINA : Zia sia leh pha hetna sung ah mihiamte, ama leh ama, a kivai puaknau sung ahin, a phalo, a hoilo, a diklo, tapi a pian dawsak tau ti in, Pathian inle, Dispensation, hi chawmkhat mihiamte kivaipuakna (Human Govt.) kiti kawt chuam khat ahun hawn daw, law ahi zaw tai.

Suapite haw, eima sia leh pha hetna kinga, tichung chang ah, I gen daw teu hi I sermon belapna a pan thei na ding in Lalpan a thu eimalsawm piak taken.

GINNA AH THAMUANNA

*Rev.Dr.Khupkam Vaiphei
Executive Secretary RCG*

Bible changtel Romte 15:13.

Thagau Thiangtho thilthitheina ziaka kinepna lian tak nei ah la hung um theina dingun, Ginna ziaka thamuanna leh kipakna zosia ah chun Pathian chun hun hidim ta hen.

Thamuanna leh kipakna ti hi Ginna ah kipat chan ding nei ding ahi dan pu Pual in Rom mite kiangin ala gen hi hawi deu in ngaitua thak tiam hi hitiu. Ginna hi min anei le bang kim in abuai ngai lo uh ahi. entiamu, Ginna ah lawichan thumte kha, 1,Sadrak, 2,Meshak leh 3,Abednegaw ten Pathian taksanna leh a chung ah Ginna ala nei ziakun, Lengpa Nebukanezar in milim lian tak a siam ma ang ah mipi zosia bawkkhup a hochiat ding, kuale milim anga bawkkhuplo te chu meipi kuang sungah selut ding ti thupiak amat lo ziakun, Lengpa kiangah hek in a um ua, Lengpan thudawt anei lai in a dawnhu nau thuchang kha ahi kagen nuam pen chu. “Aw Lengpa, ana ka sep uh Pathian chun meipi kuang lutlut lak leh nangma khut ah kipat ei hukdawk thei a hi chun, ei hukdawkmai hen (BSI) (TBS in vang hiti hin agen a, “ka Pathian chun ei hukdawk ding ahi” ati ahi). Ahinla, a chutilo tak leh le, aw lengpa, la sana milim siam chule ho diak lo ding ka hui ti he ta’n, tin a dawn hu tau a. **Danial 3: 17-18**

Amaw cheng thum khan, thupiak amat lo ua ahile, Meipi kuang lut lut lak a selut ah um ding ahiu ti thu ahet lai un, adawn hunau thuchang khu Ginna/taksanna neilo ten gen ngam kei lo ding ahiu ti hetthei ahi, a zia chu bible ah Hebrai ziktu’n ala gen, “:Ginna chu thil um ngei, i kineppi, mu chu hinailo, himaleh, hiatchianna i nei thei chu ahi” ati ahi. **Hebraite 11:1**

Pual in Romite kiangah ala gen “Thagau Thiangtho thilhitheina ziaka kinepna lian tak nei ah la hung um theina dingun, Ginna ziaka thamuanna leh kipakna zosia ah chun Pathian chun hun hidim ta hen ati hi, eimau a um Thagau Thiangtho chun zia kinepna chu eineisak in, kinepna gual ma in ei mu sak ahi ti aki chian ahi. Ginna iti hi Pathian Thagau Thiangtho panglo in umtheilo ahi, mihing ngaituana chun vakgelthei himaleh, Thagau panglo in taksanna umtheilo ahi, lataksanna chun lakinepna ahun sukpitin ding ahi ti he chian chiat hit tiu.

“Aw Lengpa, ana ka sep uh Pathian chun meipi kuang lutlut lak leh nangma khut ah kipat ei hukdawk ding ahi” ti thu vak gen ngam ziangna hi Ginna/ taksanna dik tak chu ahi. nang lahaksatlai leh la bei dawn lai ah Pathian la muang ngam na em? La Ginna chun ahun thamuan zo tak tak na em? Ki ngaitua thak chiat hitiu in, Thagau Thiangtho thilhitheina zal ah kinepna liantak nei inle, Ginna ziaka thamuanna leh kipakna chu nei thei dingin lalpa’n athu igen teu ei hun malzawl taken. Amen.

PAUCHAPNA HETDINGTE

- 1) RCG kumtawp khawmpi Annual Assembly cum General Election date: 19-21st, March, 2021 hun sungah Mualkawnbung khua ah um ding ah programme siam zawsa te hi buaina umlo ah Thagau leh taksa ah lawting tak ah mat ahi thei na dingin.
- 2) Tukum hi kitelpina um ding ahi ziak in, Pathian mi, taksa leh thagau ah leadership qualified tak tak mi teldaw ahung hithei na dingin.
- 3) Tu leh tu ah RCG center Choir ten laa leh video shooting bawl dingah aki zilnau fel tak le bukim tak in muthei dingah ahun bawldaw thei na ding un.
- 4) Leimakhong area ah P.Gamhawi mun ah RCG Biakin tu March 2021 tha sungah tundaw vak ahithei na ding in.
- 5) Pawlpi sungah Revivalist khat ahung pian daw thei na dingin.
- 6) Revival Kochuam hung hatna dingah pan lak hun gua Prophet Joe James USA a ding leh training mun hawn daw ahi thei na dingin.
- 7) Tu leh tu ah biakin sathak P.Gamhawi leh Mualkawnbung kochuam ten Biakin kilawm tak ahun tundin daw thei na diu in.

HIATSAKNA

Zion Thusuak hi kum khat ah lakman Rs, 100/- bep ahin, apia nailo ten hun piak gawleu chun kipak um ina.

Kuataw bang mimal sawm ah khat hi henlang Zion thusuak subscription fees hitale gal a pat Bank ah hun thun nuam ten anuai ah Bank min leh A/C Number ahin hun thawt leu chun kipak um ina.

Account Name: **Revival Church of God**
Account Number: **11343704608**
Bank name: **State bank of India**
Branch: **Churachandpur branch**
IFSC: **SBIN0006182**
Branch code: **6182**

PATRON MEMBER

1. Pu Thangboi, Kohima
2. Nu Niangneu, HQ Veng
3. Nu Lily, T.Munjang
4. Nu Samboi Vanghoiphai
5. Pu GL Muana Neitham

Patron members kum 3 (thum) 2020 apat Rs 1,000/- hita ahi.

-Editor Zion Thusuak

Collector/Magazine Agent

- | | |
|-------------------------|-----------------|
| 1. Tv. Joel | Hilltown |
| 2. Tv. Lawmthang | T. Munjang |
| 3. Pa Paelim | Kangvai |
| 4. Upa Tongjang | Imphal |
| 5. Nk. Jangneikim | Nakhujang |
| 6. Upa Manglun | S. Elimphai |
| 7. Upa S. Haupu | S. Kanan |
| 8. Pa Mangminlun | Gawtangkawt |
| 9. Pa Khamneu | Jordanphai |
| 10. Tv. Hauginlian | Bewlahlane |
| 11. Nk. Paknu | Mualkon |
| 12. Tv. Khaimuan | Mantripukhri |
| 13. Pa Lenghau Phaltual | Vanghoiphai |
| 14. Pro Pastor Lianboi | P. Gamhawi |
| 15. Upa Lalla | L. Vaiphei Veng |



Special Assembly Kikhawp khawmna hun, S. Kanan Village



Special Assembly, S.Kanan Village, 13/02/2021



Mission Leader te Sualsim pauchap khawmna



Mission Leader te Sualsim Pauchap khawmna, Hilltown, 17/02/2021



Mission Leader te Sualsim na pauchap khawmna pang mipi te

BOOK POST

To,

RNI Regd. No. 34293/80

.....
.....

Stamp

If undelivered please return to:

The Editor

ZION THUSUAK

RCG Office Hilltown, PO Box – 91

Churachandpur – 795128, Manipur

Email: Khupkamvaiphei@gmail.com

www.rcg.org.in

contact: +91 9612652209